


Creazione

A Scapera di San Ghjuvan Battista

Philippa Santoni



Setti veli m'ani avviluppatu, ùn erani micca pà mè ma sò quiddi chì m'ani purtatu. Setti minuti da sugillà un'eternità. U desideriu di a mamma hè statu più forti chì quiddi di a fiddola. A so bocca nascenti vulia dà un basgiu ma l'altra più smurtita m'hà fattu tumbà. Ùn l'aghju pussutu veda, solu aghju intesu. Aghju ussirvatu, aghju custatatu, aghju cuntistatu... Avà socu prighjuneru di i muri, di un corpu, di un cori. Qualcosa di più maiò hà dicisu, qualcosa chì mi supraneghja. Innò ùn hè micca Diu, eddu m'avaria salvatu. Ghjè qualcosa di più altu... Ghjè una donna, ghjè sta donna. Ùn hè micca stata criata da Diu, ghjè l'opara di a tarra ficundata da u sanguì.

Ùn hè micca u Celu chì hà vulsutu virificà a me fedì, ghjè a tarra chì hà vulsutu abissammi.

A mamma hà avutu ciò ch'edda vulia ma a fiddola ùn l'hà avutu. I setti veli m'ani presu a me vita, ma à tè, o rè, t'ani presu u ghjudiziu. Mi ni vocu libaru ma tù sarè sempri ligatu cù setti cateni. Nant'à stu piattu d'arghjentu u me capu sanguinosu firmarà in a to menti. Ghjè cusì: a donna hà cummandatu, a ghjuvanotta hà ascultatu, l'omu hà eseguitu.

Com'è i setti peni di Maria, ghjè una spada chì m'hà sdrisgiatu.

Nant'à un piattu d'arghjentu hè purtatu u me capu. L'arghjentu paria focu frà a faccia di a vergini infiarata chì si rispichjava annantu è u me sanguì chì scurria. Forsa, vi brusgiarà à tutti

l'ochji d'ùn veda a morti di un nucenti, a morti di a virità.

A fiddola pienghjarà è a mamma si ni lavarà i mani, ùn socu u primu chì hà cunnisciutu què, di tutta manera avà l'acqua com'è u sanguì scorri. È cù appena furtuna stu mischju si trasfumarà in vinu. O rè pidda stu calici è bii da ricurdà ciò ch'ai fattu ma dinò da sminticà.

O Madonna fetila finita ùn ni possu più, l'ultimi soni chì voltani in u me capu sò « Iokanaan » prununziatu da a so bocca ghjuvanedda. Quidda chì simbulizeghja i setti peccati s'hè avvicinata. I me ochji si chjudini à tempu à i soi. Capiscu chì stu sonu ùn era micca imaghjinariu. Infini l'avarè datu stu basgiu.

Avà mi ni vocu è un'altra donna m'hà d'accogliu, sarà un altru velu ma sta volta turchinu è micca rossu com'è u sanguì ch'aghju spartu.

A vecu... quali hè? sè tù... ùn possu, ùn voddu... Anc'a morti ùn m'avarà sbarrazzatu di tè, ai sceltu di ritruvammì... firmaraghju prighjuneru di stu mumentu... l'aghju da riviva, m'hà da suvità, parseguì...

Parchì ùn ci hè nimu da aiutammì? Aghju circatu a virità, l'aghju trova, l'aghju ditta è avà pagu pà quistu... Aghju capitu... sè quì da ramintammì a virità, a me virità, forsà ùn era micca quidda di a to mamma è di u to patrignu, solu era a meia... Avà ùn cercu più a virità, cercu altr'affari: par piacè dimmi indu'sarà stu lucacciu chì a me paci mi darà...